

REGIONAL NEWS BULLETIN

HEADLINES (EVENING)

Date – 04/11/2025

Time - 18:30 -18:40Hrs

- Ramchhungah GST 2.0 kalpui a nih hnuah Mizoram sorkarin GST atanga chhiah a hmuh a pung
- Women's U-19 T20 Trophy 2025 Plate Group final vawiina khelkhawh zawh takah Mizoram chuan Manipur chu run 72-a hnehin an champion.
- Bihar Assembly inthlan thawhkhatna atana campaign theih hun chu vawiin tlai khan a tawp a. Ningani ah vote thlak a ni ang.
- Election Commission chuan Special Intensive Revision of Electoral Roll thawh hnihna chu vawiin khan a kalpui tan.

<><><>

GST

Ramchhungah GST 2.0 kalpui a nih hnuah Mizoram sorkarin GST atanga chhiah a hmuh a pung a; GST 2.0 hnuaiah sumdawng engemaw zat lakah complaint lutin, an pawisa chawi tura chhût chu cheng nuai 10 vel a tling tawh.

Taxation department hotute chuan Akashvani News Aizawl zawhna chhangan, kumin Sepetember 22 atanga India ram puma GST 2.0 kalpui a nih hnuah Mizoram chuan GST atanga chhiah a hmuh zat a pun thu an sawi a; kumin August thla khan GST-ah cheng vbc 63 point 79 hmuh a ni a, September thlaah ni 22 atangin GST 2.0 kalpui a ni a, hemi thla hian GST cheng vbc 71 point 51 hmuh niin, vbc 7 point 72-in a puang.

GST 2.0 vanga GST rate tlakhniam vangin sorkarin GST a hmuh tur a tlahniam dawn anga sawi a tam thu leh tlahniam tur ni se chuan thla liamta October-ah khan GST hmuh chu tlahniam tawh tur a nih thu Taxation hotute chuan an sawi a; October thla khan GST-ah cheng vbc 76 point 98 hmuh a ni a, September thla aiin vbc 5 point 47-in a pung leh a ni, an ti a, a pun chhoh zel an beisei thu an sawi.

Taxation hotute chuan GST 2.0 hman hnuah dan zawm famkimlo sumdawng an tam thu leh complaint an dawnte an bawhzui nghal zel thu an sawi a; tunah hian sumdawng 100 dawnin GST dan an zawm famkim loh avangin cheng nuai 10 vel penalty chawi tur an neih thu an sawi.

Customer-te hnena pek tur tax invoice pek loh chu sumdawngte'n GST dan an zawm loh thinna tam ber a nih thu leh MGST Section 122 chu hremna an lekhawhna tam ber a nih thu Taxation hotute chuan an sawi.

Mizoram sorkarah thawktu leh lirthei an dil belh mek thu sawiin, dan loa sumdawngte dapchhuah hna te, chhiah pe lo leh chhiah an pek tur ang pe loa sumdawnga lian tak tak kalpuite dapchhuah hnate ngawrh zawka thawh chhoh an tum thu an sawi bawk.

<><><>

CM

Chief Minister Pu Lalduhoman Lai leh Mara te inhumhalhna tu sixth schedule chu a hlu tak zet a, direct funding te pawh an duhsak a ti.

Vawiina Mara Students Organisation (MSO) din champha kum 60na Diamond Jubilee lawmna Govt.Saiha College Auditorium-a neih a hmanpuinaah he thu hi sawiin Chief Minister chuans ixth schedule hlut thiam tur leh hmang tangkai tura chahin district council te pawh an hnathawh leh thiltihte a rintlak chuan thuneihna pek belh zel an duh a ti.

Chief Minister chuan zirlaite chu ruihhlo laka fihlim tur leh do tura chahin a zuartute dim lo tura chahin social media te hi a tangkai zawng chauha hmang turin a chah bawk a, An sorkar a hna ruak te tunlaia sipai lam hnaruak te, India ram chhunga thawh tur hna ruak tam tak te leh sumdawnna lam te harh a tanla turin zirlaite chu a chah bawk

MSO diamond jubilee lawmna khual zahawm CEM Pu M.Laikaw pawhin thusawiin hnam tenau zawkte duhsaktu Chuef Minister an nei chu lawmawm a tih thu a sawi a, MSO te jubilee duhsakna a hlan a, amah pawh term hnih lai president lo ni ve tawh a ni a, ram tana ke an penna leh an thawhnaah an hnungah an awm zel dawn a ni, a ti bawk.

Programme tan hma hian MSO Hqrs office ah Diamond Jubilee lungphun leh MSO diamond Jubilee Hall chu Chief Minister Pu Lalduhawma hian a hawng bawk.

Mara Students Organization hi kum 1965 November ni 4 khan Shillong khawpuiah din a ni.

<><><>

MNF PR

MNF President Pu Zoramthangan ZPM sorkar pawikhawih zozai chu MNF sorkar leh hunah siamthat leh a ni anga, nuaibo vek a ni ang a ti.

Vawiina Thorang bial, Lungen Chhimveng YMA hall-a, political training leh mithar lawmluhna hunah thusawiin, Pu Zoramthanga chuan ZPM chu enchhin sorkar mai an ni a. Saiip puan sina bultan chu zu khapna dan ennawnna in a zui a. Contract hna inpeknaah nasa takin pawl an khawih a. Ram an hralh a, ram rohlu tihral an tum zel bawk a ti bawk. Kawngchhiat lutuk avangin hnamdangte phei chuan lirthei chunga chuang chung pawhin kawng an hmu theilo hial ni a sawiin Pu Zoramthanga chuan hmuntinah kawng a chhia a, kawng siamthatna tur chhiah an la chung pawhin kawng siamthat a ni chuanglo a ti a. Aizawl khawpui mamawh khawp pawh tui pump theilo ten, tuikhuaha tui pump an tum thute an sawi a. Hmun tinah enchhin fuhlohna thawm a ri ring hle a ni a ti.

<><><>

SERCHHIP AR

Serchhip a inkhuar 14th Assam Rifles hotu ten Serchhip District MJA Member te lengah sawmin, thawhpuih an sawm nghal.

He hunah hian Assam Rifles Second-in-Command Lt.Col. Sunil Mehta chuan 14th Assam Rifles te chu 'Friends of the Hill People' an nih angin Mizo mipui te tan Civil Action Programme hnuaiah kawng hrang hrang an in an luangchhuak ve thin tih a sawi a. Orphanage Home hrang hrangah tanpuina te pe in khaw engemawzatah Free Health Checkup te an neih thin thu te, NGO- YMA leh MHIP te pawh a theihna kawng kawngah an tanpui ve thin tih sawiin Serchhip Boxer te zin nan Bus te hial pawh an ruahman sak tawh tih a sawi a, Ruihhlo tawlhruk man kawng mai bakah

dan phalloh thilralthuam leh a a dangteah pawh theihtawp an chhuah reng thu tarlangin, Serchhip a 14th Assam Rifles te hian Journalist te nen thuk taka thawhho reng an duh thu leh chumi tur chuan leng ah an sawm tih a sawi a.

He inkawmhonaah hian Serchhip Dist. MJA Vice President leh Serchhip Times Editor ni bawk Pu Kapliana Pachuau chuan thu sawiin Serchhip a lo awm tawh Assam Rifles Batallion dang te nen pawh thawhhona tha tak an lo nei tawh thin thu a sawi a, tuna Serchhip a awm mek 14th Assam Rifles ten Ruihhlo tawlhruk an man tawh zozai te, Champhai leh Serchhip District chhung khaw hrang hranga pawl leh Home hrang hrang bakah YMA leh MHIP ah te tana an luangchhuak thin chuan mipuite thla a tih muan thu sawiin, Ruihhlo leh Helpawl hrang hrang laka Mizoram tana an thawhna kawngah Journalist ten tih theih leh tangkaian an neih phawt chuan an inhuam reng thu a sawi bawk a ni.

Assam Rifles leh Serchhip District MJA te hian Whatsapp Group intawm siam nise tiin, hemi kaltlang hian 14th Assam Rifles hmalakna leh hnathawh hrang hrang te chu MJA Member te hian mipui hnenah an theh darh leh thin dawn a ni.

<><><>

TA MEETING

Tun thla ni 15 atanga Rajiv Gandhi Stadium, Mualpuia Mizo Territorial Army lak runpui neih tur atan inbuatsaihna kalpui mek a ni a,

Vawiin khan mawhphurhna nei department hrang hrang te inpuahchah dan leh hmalak chin thlirhona meeting, Rajiv Gandhi Stadium VIP’s Lounge-ah neih a ni a. Meeting hi Lt.Col. Clement Lalhmingthanga, MLA leh State Level Committee on Territorial Army Coordination and Establishment Chairman ni bawk chuan a kaihruai a ni.

MTA recruitment Rally hi Mizoram sawrkar leh 166 INF BN, Assam te tangkawpa buatsaih tur a ni a, tha tak leh tluang taka neih a nih theih nan hian Mizoram Sawrkar hnuaia department hrang hrang te bakah NGO leh Local Council thenkhat te hnenah mawhphurhna chanvo hrang hrang pek an ni a. Vawiin meeting-ah hian chung an mawhphurhna hlen chhuak tura an hmalak tawh chin leh an hmachhawp te thlir ho a nih bakah Inter- Department Coordination tha pawimawh zia te sawiho a ni bawk.

Meeting-ah hian Pu Clement Lalhmingthanga chuan thalai te tana MTA Recruitment Rally hlutzia hria a, mahni awmna khua leh veng a n thalai te hnenah recruitment rally a tel tura infuih a pawimawh a ni a ti a, General Duty personnel-ah mi 144 lai lak a ni dawn bakah hmeichhe tan seat 9 reserved sak a ni bawk dawn a. A dil thei chin pawh kum 18-42 inkar lai a nih avangin a huam zau hle a ni a ti.

An hlawh te a that mai bakah mahni state-a awm reng siin, hard posting allowance ₹9000 vel lai an la dawng bawk dawn a, 8th pay te an hman hunah phei chuan hlawh sang tak an la dawn a ti a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

WOMENS U19 T20

Women's U-19 T20 Trophy 2025 Plate Group final vawiina khelh zawh takah Mizoram chuan Manipur chu run 72-a hnehin an champion.

India rama cricket thuneitu sang ber - Board of Control for Cricket in India (BCCI) hnuaia inelnaah Mizoram hi junior leh senior huapin an champion vawi khatna a ni.

Lucknow-a inkhelah hian thum vawra chak zawk Manipur-in vawm hmasak an thlang a. Mizoram-in Over 20 chhunga run 117 siamin wicket 6 an hloh. Opener Vanlalruatpuii'n run 68 a siam a, Sandhia Rai-in run 29 a siam bawk.

2nd Innings-ah Manipur-in Over 14.4 chhungin run 45 chiah siamin an out vek. Branda Rosepawngia chuan wicket 3 lain, Sandhia Rai leh Zothanmawii Rokhum te'n wicket 2 ve ve an la bawk.

Mizoram hi Plate Group-a an champion avang hian season tharah Elite Group-ah an khel dawn a, India rama cricket thiam state lian dangte nen an inel tawh dawn tihna a ni.

<><><>

BIHAR

Bihar Assembly inthlan thawhkhatna atana campaign theih hun chu vawiin tlai khan a tawp a. Ningani ah vote thlak a ni ang. Campaign hun tawp ni ah Political Party tin ten mipuite vote hui tumin theihtawp an chhuah a. BJP, Janata Dal (United), Rashtriya Janata Dal, leh Congress hruaitute chuan hmun hrang hrangah vantlang inkhawm an buatsaih a ni. Puan tawh angin inthlan thawhkhatnaah hian Assembly bial 121 ah vote thlak a ni dawn a. District 18 huamchhungah inthlan hi neih a ni ang.

<><><>

SIR

Election Commission chuan Special Intensive Revision of Electoral Roll thawh hnihna chu vawiin khan a kalpui tan a. Tun tumah hian State pakua leh Union Territory pathumah SIR hi neih tur a ni a. Vote nei vaibelchhe 51 chuangte ngunthluk zawka endik a ni ang a. Nakum 2026 February ni 7-a final electoral roll tlangzarh thleng he ennawn runpui hi kalpui a ni ang. SIR tihna te hi Andaman and Nicobar Islands, Lakshadweep, Chhattisgarh, Goa, Gujarat, Kerala, Madhya Pradesh, Puducherry, Rajasthan, Tamil Nadu, Uttar Pradesh, leh West Bengal te an ni a. Heng zingah hian Tamil Nadu, Puducherry, Kerala, leh West Bengal te hi kum 2026 a inthlang tur te an ni a. Special Intensive Revision ah hian voter te chu an pianna hmun tihchian a ni a. Hei hian a tum ber chu dan kalha ramchhunga lo lut abikin Bangladesh leh Myanmar mi zawnchhuahna tur hmanraw pakhat a nih thu kan correspondent chuan a sawi.

<><><>